

Prvi sastanak Kabineta

Visoki predstavnik, Wolfgang Petritsch, je jučer predsjedavao prvim sastankom Kabineta sastavljenom od šefova međunarodnih organizacija i misija u Bosni i Hercegovini. Kabinet i četiri radne grupe, koje se bave pitanjima ekonomske reforme, povratka i rekonstrukcije, jačanja institucija i vladavine zakona su ključni elementi reorganiziranog i pojednostavljenog angažmana međunarodne zajednice u Bosni i Hercegovini. Ovu jednostavniju i efikasniju strukturu je odobrio Upravni odbor Vijeća za provedbu mira u Briselu 28. februara ove godine.

Prvom sastanku Kabineta su prisustvovali general pukovnik COMSFOR-a John Sylvester, COMSFOR, specijalni izaslanik generalnog sekretara Ujedinjenih nacija Jacques Paul Klein, komesar IPTF-a Vincent Coeurderoy, šef Misije OSCE-a u BiH Robert Beecroft, zemjenik šefa Misije UNHCR-a Udo Janz, rezidentni predstavnik Programa za razvoj Ujedinjenih nacija (UNDP) Henrik Kolstrup, direktor Svjetske banke Joseph Ingram i otpravnik poslova Evropske komisije Renzo Daviddi.

Učesnici sastanka su razgovarali o detaljima nove operative strukture i razmatrali način na koji bi rad međunarodne zajednice bio otvoreniji za javnost, kao i na čine za bolju saradnju sa bh. organima vlasti.

Visoki predstavnik je zatim obavijestio članove Kabineta o razgovorima koje je vodio sa liderima osam glavnih političkih stranaka u BiH o amandmanima na Ustave entiteta, kao i o izvještaju koji je podnio Vijeću sigurnosti UN-a protekle sedmice. Svjetska banka je izvijestila skup o budžetskim pitanjima entiteta, a OSCE je iznio informacije o razvoju projekta za mlade BiH čiji je cilj da proizvede kadrove mladih lidera u BiH za oblasti kao što su poslovanje, obrazovanje,

mediji, nevladine organizacije i politika. Ti mladi lideri bi onda preuzeli inicijativu u razvoju lokalno održivog leaderskog programa.

Ovaj sastanak predstavlja novu fazu u angažmanu međunarodne zajednice u BiH koja podrazumijeva uže, a efikasnije prisustvo međunarodne zajednice. Ovaj pristup je zamišljen kako bi međunarodna zajednica postala bolji partner domaćim organima vlasti u nastojanjima da u potpunosti preuzmu odgovornost za BiH.